

四庫全書

史部

欽定四庫全書

閩中理學淵源考卷三十三

廣平府知府李清馥撰

文毅洪陽巖先生天錫學派

按先生以開濟偉畧為廟堂倚重同郡邱氏葵早志
考亭之學遊先生之門者最久又同時有徐擇齋先
生明叔者亦與同學齊名考泉南九日山石刻舊
題寶祐六年公嘗從徐公明叔梁公椿選呂公中方

公澄孫王公廣翁同遊紀盛故梁呂方俱列之交友
馮王廣翁未詳待考再按南軒門人蘓氏國台從孫
三英亦登公與擇齋之門可知洪徐二公為一時典
型物望宋季學派賴以維持淵源所漸盛矣

文毅洪陽巖先生天錫

洪天錫字君疇號陽巖晉江人寶慶二年進士授廣州
司法歷知古田縣剖決無留按誅倚藩邸勢殺人者調
通判建寧郡大水擅發常平倉賑之擢諸司糧料院拜

監察御史兼崇政殿說書理宗寶祐間宦寺肆橫外聞
朝紳多出門下廟堂不敢言天錫來自孤遠首疏以正
心格君為說且曰臣職在憲府不惟不能奉承大臣風
旨亦不敢奉承陛下風旨朝端耳目一時聳動次月囊
封申劾宦官董宋臣外戚謝堂知慶元府厲文翁不法
狀疏上理宗力護之令大臣吳燧宣諭再三天錫力爭
謂貴倖作姦犯科根柢蟠固異日勢燄愈張雖欲活之
不可得已理宗俾天錫易疏欲自戒飭之天錫言自古

姦人外雖憑怙心未嘗不畏人主之知苟知之而止戒
飭則憑怙愈張反不若未知之為愈章五上出關待罪
有詔謝堂厲文翁已改命宋臣續處天錫言臣義不與
宋臣共留會天雨土天錫奏其異為蒙為不辨君子小
人所致又言今蜀中地震浙閩大水上下困窮遠近怨
疾獨貴戚巨閹安享富貴不知陛下能獨與數十人者
共天下乎值宋臣復奪民田天錫申劾之上猶力護天
錫又言修內司祇供繕修比年動稱御前故凡姦賊老

吏積捕克渠皆竄名其間有司不得舉首小民展轉受害恐使後日史臣書曰內司之橫自今日始不報疏至六七上最後請還御史印謂朝廷輕給舍臺諫百司庶府而獨重北司倉卒之際臣實懼焉言雖不果行然終帝之世閹人不至大竊威福蓋天錫有力云御筆改大理少卿遷太常皆不拜明年起知潭州兼湖南安撫使至則戢盜賊尊先賢踰年大治遷直寶謨閣廣東運判決疑獄劾貪吏治財賦皆有法則召為秘書監侍講以

贖辭升秘閣修撰福建轉運副使又辭度宗即位以侍御史兼侍讀累召辭不許乃疏所欲對病民五事曰公田曰會子曰銀綱曰鹽鈔曰賦役又言在廷無嚴憚之士何以寢姦謀遇事無敢諍之臣何以臨大節人物稀疎精采銷悞隱情惜己者多忘身殉國者少擢工部侍郎兼直學士院加顯文閣待制湖南安撫使知潭州改漳州皆力辭又明年改福建安撫使力辭不許至官首罷亭戶買鹽之累止荔枝貢召為刑部尚書進顯文閣

直學士五辭召命特改華文閣奉祠轉端明殿學士致
仕咸淳八年卒疾革草遺表以規君相上震悼贈正議
大夫謚文毅天錫動有準繩居官清介臨事是非不憚
面折所著奏議經筵講義通禮輯畧味言發墨陽巖文
集宋周密曰近世敢言之士雖間有之其終始一節明
目張膽言人所難絕無僅有惟溫陵洪公一人

閩書
參宋史

秘書呂時可先生中

以下
交友

呂中字時可晉江人淳祐七年進士歷沂靖惠王府諸

王官大小學教授輪對言當去小人之根革臧吏之弊
遷國子監丞兼崇政殿說書奏乞晚輪二員說書夜輪
講官直宿以備顧問又言進講經史乞依正文進讀不
宜節貼避忌不惟可察古今治亂亦以革臣下諂諛之
習又言人能正心則事不足為君能正心則天下不足
治尋以兄卒無後請假歸葬明年以秘書郎召丁大全
忌其直徙汀州在汀暮年演易為十圖景定中復舊官
卒著皇朝大事記治迹要畧論語講義

閩書

正守梁壽卿先生椿選

梁椿選字壽卿晉江人淳祐元年以省試經魁登第有文學之譽歷官通正守寓在安溪來蘓里作湖山書院學士多從之遊亦寓賢也再考安溪清水寺志景定四年梁公曾為承議郎行監察御史崇政殿說書有記文

可考云

按梁公椿選倡學湖山之來蘓里其遺踪往迹莫得詳矣嘗讀清源文獻公於咸淳元年季春

撰安溪大成殿記畧曰夫子之道固不以廟興廢為存亡然示學者之依歸尊正傳之宗主賴有此爾今為吏者惟知簿書期會之間上以督責為功下以趨避為能至有漠然視學校如傳舍者聖賢之居頽弊摧壓慢不

之恤風俗日卑人材日陋莫有知其故者鍾侯國秀於邑焦熬不憚搏節興此鉅役是則可書也已觀此知公之崇獎名教挽回風俗所以規警為吏者至深切洵為清溪一時興學之倡欲俎豆湖山師席者能無溯厥淵源哉再按梁公事跡安溪舊邑志只載在奠方內未曾立傳謂公係寓賢也因志乘缺寓賢一類附見之此爾後之欲修葺邑乘者似當增補此門目奉文公朱子為寓賢之首蓋文公之簿同安時奉檄往來安溪愛其山川清淑是公開人文之先其始基之矣謹識之以待考訂乾隆丁丑六月初十日

丁丑六月本閩書紀此傳之後因挾兒輩及黃甥等赴郡應試念一日舟行九日山是日於延福寺午餐扶杖登山麓摩挲石刻大槩宋元間碑蹟最盛未得徧觀因讀宋寶祐六年三月徐仲晦諸公與公同遊九日山之勝乃知公與諸賢同時往復自是一時之選因與甥輩兒輩考同記憶石刻取筆錄歸今并附載備考

寶祐六年三月甲戌徐明叔仲晦洪天錫君疇方澄孫蒙仲王廣翁居安梁椿選壽卿同登懷古寺酌菩薩泉瀹茶觀石像訪姜秦舊蹟小飲聚秀摩挲明翰墨探韻賦詩抵暮期而不至呂中時可

乾隆三十一年丙戌六月十四日以旱曠踏勘田畝是晚上清水巖宿尋訪清水志僧因取出舊刻底本數帙為明季邑令許公自表所葺者內載蓬萊山清水寺興造記一篇為有宋徐公明叔記知安邑事黃裳篆蓋承議郎行監察御史崇政殿說書梁椿選立石其記之年為景定四年四月吉日讀此則梁公曾為監察御史崇政殿說書而本傳寥寥莫詳只叙歷官通正守今增入本傳錄此附考 閩書 清源文獻 安溪邑志莫方類 清 水巖志

備考

洪氏天錫序趙四書纂疏曰或問尹和靖讀易傳之法
和靖曰體用一源顯微無間李延平聞之曰此語固好
然學者須理會六十四卦三百八十四爻皆有歸著方
可及此二先生豈異旨哉言各有當也蓋學不可以徒
博亦不可以徑約徒博則雜徑約則孤此約禮必先之
以博文而詳說乃所以反約也文公朱子之於論孟既
成集義又作詳說既約其精者為集注又疏其所以去
取之意為或問其後集注刪改日以精密而或問遂不

復修文公自謂集注乃集義之精細一字稱輕等重不可增減讀論孟者取是書焉可也格庵趙公復取文公口授及門人高弟退而私淑與集注相發者纂而疏之間以所聞附於其後使讀之者如侍考亭師友之側所問非一人所答非一日一開卷盡得之博哉書乎然非約之外有所謂博也人莫不飲食也知味者鮮文公一生精力多在此書一章之旨一字之義或數年更易而後定或終夜思索而未安學者以易心讀之豈能得聖

賢之意哉如援先儒與諸家之說有隨文直解不以先
後為高下者有二說俱通終以前說為正者有二說相
須其義始備不可分先後者設非親聞未易意逆此纂
疏所以有功於後學也僕晚未聞道加以衰瞶廢學公
不鄙辱教且命之曰序以屬子竊惟論孟二書文公凡
幾序矣僕於要義而得熟讀深思優游涵泳之說於訓
蒙而得本末精粗無敢偏廢之說又於集義而得操存
涵養體驗充廣之說終身受持猶懼不訖何敢復措一

辭抑文公曾有言曰大學一書有正經有注解有或問
看來看去不用或問只注解足矣久之不用注解只正
經足矣又久之自有一部大學在吾胸中正經亦不用
矣此文公喫緊教人處也僕於集注纂疏亦云

侍郎徐擇齋先生明叔學派

按公為西山真文忠公所鑒識指授與陽巖洪公齊
名余氏謙一述綦詳矣

侍郎徐擇齋先生明叔

徐明叔字仲晦晉江人父伯嵩理宗紹定五年進士辟
江淮制幕秩滿幹辦廣漕清節益勵除太學錄通判漳
州以廉聞知英德府徭寇不敢犯召為國子監丞潮寇
起命知潮州捕戮渠魁除直秘閣江右憲歲歉發義倉
賑民遷戶部侍郎改兵部會元兵南下憂憤卒明叔學
有源委與洪天錫齊名人稱擇齋先生

閩書
獻

莆陽文

備考

余氏謙一序徐擇齋文集曰往歲莆有後村劉公福有

竹溪林公泉南有擇齋徐公陽巖洪公皆吾閩文章宗
匠竹溪後村集既板行家藏而人誦之矣陽巖擇齋後
卒不幸與壞劫會嗣子門生伏匿奔踣不暇遺集久之
莫克會萃有志於斯文者歎息焉一日擇齋之子籌老
奉先集以授門人余謙一俾為之序開編伏讀則公年
耆老官顯榮之日所作蓋公平生藁就輒棄嗣子少長
始從旁抄錄得之茲特太山之毫芒耳謙一既喜於成
編而又懼不敢當序筆辭不獲乃稽首而言曰昔之人

論著多矣少壯之氣銳而老則衰窮苦之辭工而貴則
墮呂紫微周平園猶未免此病而公年益老官益高作
為文章略無一毫頽墮衰竭之態此其故何哉蓋不以
老壯窮達為進退者氣實為之天地間有所謂至剛至
大者是為浩然之氣故孟氏之學以養氣為先是氣也
資育失其勇儀秦失其辯良平失其智眉山蘓氏亦以
是稱昌黎公然後知孟子韓子之文純粹明白汪洋而
大肆者氣之所充也豈特韓孟為然蘓氏之文亦然故

欲論公之文者不于其文而于其氣公為人剛方巖峻
一介不以取予人意所不可雖當路有權勢者不肯以
辭色假借之開口論時事若不知有諱忌以故憚黯疾
固者多人輒斥召輒寢所謂諫書講卷綸言史筆皆公
所宜擅曾不得一出其所長山林歲月之外麾節弓鈇
竟展轉外服以老德祐初元嘗以第一人起之而公老
且病矣今觀公之論著文與詩大抵尚安律不尚奇怪
尚典雅不尚纖巧陽巖每稱仲晦之文最宜臺閣人以

為知言公於書無所不讀料飽而思敏每下筆娓娓千
百語不能休西山真公之守泉也公以翰墨受知遂付
以斯文之事淵源所漸有本固如是夫因竊歎西山為
南渡歐蘓門人經指授者多以文名于世四十年來凋
零殆盡歸然靈光獨東澗與公耳二公歿文章之統紀
遂絕而奎運終焉嗚呼斯文興廢豈非天邪讀斯編者
將必掩卷而流涕矣

州守余子同先生謙一

余謙一字子同莆田人祖奭之元孫師魯之子也與弟士明連中江西漕試而謙一第咸淳元年進士調泉州石井書院山長召為國子監書庫官除太學博士改宗正寺簿差知化州宋亡不仕好為古學辭語渾成警切名文章家著述數十藁兵後多散佚士明亦以進士得官知南安縣

附錄

書文安公帖後曰右先文安公遺墨一紙於里巷學童

剪截故紙中得之雖不甚完猶得五十八字蓋宦遊他鄉與母家延陵所作也方承平時公之真蹟懸金莫能致况兵火後乎冷笏舊氈誠吾家至寶此紙為家書內幅不過候問彝恭耳然篤實忠厚藹然見於情文自其本求之孝之所推也端方嚴重凜然見於翰墨由其內觀之敬之所形也書法心法也心法家法也艾軒先生論公父子嘗媿之萬石君家一言以蔽之亦曰孝謹而已烏乎後之人其勿替之哉

寄軒記曰文章宗師曰歐蕪氏歐自瀧岡竣事一迹不
至家林守穎樂其風土遂為終焉之計蕪亦出蜀不復
歸既欲歸嵩洛又欲居廬山甚者以蒜山房客自詭末
年竟歸陽羨以死委先廬樂僑寓捨故鄉留他國詎非
通人一蔽歟丁丑寇作吾族之薨連棟接者化而為烟
為埃族之人往往流徙奔竄近稍還集顯伯弟於故居
一牛鳴地得三間整屋攜妻子以居一軒明快遂以寄
名蓋曰吾先人之廬吾力未能復而心未嘗忘寄於此

非敢安於此昔重耳以晉難故奔於狄十二年一朝至齊即懷其安不復以反國為意向微子犯悔其可追乎茲名所以識也夫不更宅左氏所書能復字周公所頌予聞其言而有取焉莊列之論以身世為逆旅以宅居為傳舍此論行能使人厭檢束而事猖狂舍真實而崇幻妄余又慮夫末流之弊寄而至於媮也故君子於此不敢一日廢吾學伯鸞之於吳貧而寄者也春廡之下禮敬行焉臺卿之於北海急而寄者也複壁之中訓義

出焉乃若遭世亂離少陵翁于夔于襄于成都所寄無
定在詩自夔州以後鏗鎗蹈厲端可上媿風雅循其所
寄之跡考其歲月而論其為人學問功夫誠有不可誣
者今顯伯之寄於斯非他州異縣也非傍人籬落也其
視二三子之困厄窮亦足以為安矣人之情當厭亂之
餘則喜聞放達之論處幸安之境則易忘兢畏之心顯
伯勉諸此學之所以不可已也顯伯為余言將求扁額
二大字於石巖方子予恐未悉其所以名故為之記如

此以著其心而又使覽觀自省焉

教授徐進齋先生幾學派

按先生與何文定公基同以布衣被召其學出自紫陽西山之傳宋之末造宗朱學者儘多其人往往託跡山長晦匿海濱未得與金華四子並傳者亦多矣尋源溯派望若晨星余不能不憮然慨慕

教授徐進齋先生幾

徐幾字子與號進齋崇安人嘗與詹琦築靜可書堂於

武夷博通經史尤精於易自晦翁之後理學之傳能臻其奧景定間廷臣交薦與何基同以布衣召對授崇政說書上甚器重之詔補迪功郎遷建寧府教授兼興建安書院山長撰經義以訓多士字內尊之稱曰進齋先生其撰靜可書堂記曰余愛武夷佳山水且有佳友晚歲徙居焉詹兄琦景韓久從余遊知其為人孝弟忠信天資近道聞詩書仁義之名言躍如也一日語余曰某愛程子云性靜可以為學因名讀書之室曰靜可惟吾

子一言以發之是為幸余因進而語之曰學者於道能於其性之所近以求從入之門於道可至子性靜有志於學誰曰不可今夫利欲鬪進躁競馳逐者去道日遠苟能收斂此心鞭逼向裏勿為外物所動則其本立矣故濂溪明道二先生發明為學之要必言靜者以大本所當先也然伊川先生教人又用敬不用靜者以敬貫動靜該體用若只用靜恐都無事了又失大本當先之意故曰敬則自靜虛又曰靜中須有物始得必如是乃

可言靜謂之可者亦僅可而有所未盡之辭程伯子言
云且以開學者從入之門耳會其歸要其至則動靜無
端陰陽無始聖人之於天道昭合無間然大學之經
曰知止而后有定定而后能靜靜而后能安安而后能
慮慮而后能得此古昔聖賢道學相傳之要旨請以王
敬窮理為吾子勉他日隱屏有人曰靜可學者顧不美
美歟

詹景韓先生琦

詹琦字景韓慕韓魏公為人故名琦宋末隱武夷山南
築靜可書堂與徐幾日以聖學相勵幾稱其孝弟忠信
金石君子也有滄浪集

朝請劉靜齋先生屋學派

按晦翁沒後門徒高第次第凋落其緒言遺論亦稍
墜矣公接守家學獨與蔡九峯真西山相友善其子
忠簡先生欽又從九峯學一時師友彙征為典型之
望乾淳之後稱再盛云

朝請劉靜齋先生

劉屋字伯醇晦伯子寶慶三年知江寧為政愷悌不擾
而辨制閩以賢能薦俾兼幕府以收李全功轉朝請大
夫知常州衡州移南劍州辭疾不赴素與蔡九峯真西
山相友善與學徒熊竹谷輩講道終身學者尊為靜齋
先生著有毛詩解家禮集註子欽

王潛軒先生昭學派

按南安邑志呂氏大圭傳云大圭少學於鄉先生潛

軒王昭昭師陳北溪安卿師朱文公又泉郡萬
歷間舊志呂大圭傳云大圭少學於陳北溪門人王
昭已復盡屏詞章專務理學是邑志與郡志名字相
符矣獨閩書呂大圭傳載圭叔少嗜學師事王昭復
昭復之學得之陳淳陳淳之學得之朱文公同安志
亦與閩書同伏考圭叔先生南安志載為邑之樸堯
鄉人則少時師事王氏昭亦其鄉之人也今從南安
志郡志為據而以閩書同安志附考焉再閩書有陳

景溫傳載景溫與同郡王昭復成之等同時知名考
景溫在淳熙間時內舍生王氏昭復與之同時或別
有王昭復其人歟待再考

王潛軒先生昭

王昭號潛軒按南安邑志呂大圭傳大圭少學於鄉先
生潛軒王昭昭師陳北溪安卿安卿師朱文公號為溫

陵截派云

邑志舊郡志新郡志俱作王昭閩
書同安志作王昭復 南安邑志

侍郎呂樸鄉先生大圭學派

按先生之學淵源於紫陽文公世號溫陵截派者也
宋祚運移先生大節不奪門徒丘氏蔡贊之詳矣胡
氏一桂稱其易學管見發明多好所著春秋或問何
氏夢申跋後曰廣文呂先生加惠潮士諸士有以春
秋請問者先生出五論示之咸駭未聞因并求全藁
先生又出集傳或問二書蓋本文公之說而發明之
有五論以開其端有集說以詳其義又有或問以極
其辨難之指歸而春秋之旨昭白矣夢申預聞指教

不敢私秘與朋友謀而鋟諸梓以廣其傳焉今考春秋或問二十卷五論一卷易學管見論語孟子解以傳在學者得存然管見諸書皆不可見見者又僅此云詳見通志堂經解原序今節錄載之篇端

侍郎呂樸鄉先生大圭

呂大圭字圭叔南安人少學於鄉先生潛軒王昭昭師陳北溪安卿安卿師朱文公世號溫陵截派居家授徒數百人登淳祐七年進士授潮州教授累遷簡討宗政

殿說書吏部侍郎以操南音出知興化軍以俸錢代輸中戶以下賦著莆陽拙政錄德祐初元轉知漳州軍節制左翼屯戍軍馬未行屬蒲壽庚率知州田子真降元捕大圭至令署降表大圭不署將殺之適門弟子有為管軍總管者扶出至家以平生所著書泥封一室變服逃入海島壽庚遣兵追之將授以官不從被害年四十九其泥封室盡毀于賊獨其門人所傳易經集解春秋或問二十卷春秋五論一卷論語孟子集解學易管見

行于世所居樸兜鄉人稱樸鄉先生元孔公俊建大同書院祠朱文公以大圭配門人丘葵贊曰泉南名賢紫

陽高弟造詣既深踐履復至致身事君舍生取義所學

所守於公奚愧

按黃氏道南統緒辨正謂呂氏大圭為淳祐間進士歷官侍郎出知興化軍南

安邑志舊郡志同安志莆陽志皆同獨新郡志本之閩書稍異今從黃氏本改正南安邑志舊郡志道

南統緒

朱氏經義考

閩書

泉郡新志藁

徵士丘鈞磯先生學派

按鈞磯先生傳稱師於呂樸鄉洪陽巖之門最久當

時師門講授無從可考所著諸經說及文篇亦無傳
僅存者惟周禮補亡及其詩集耳周禮泉南尚有遺
刻詩集其家有寫本同安林氏子濩鈔得之明季遺
老盧牧洲若騰為之訂正

國朝康熙癸巳歲潯江施平園世駭重刻之云按其本
即盧牧洲及子濩所手校者詩多失次後與輪山阮
氏重訂之云以五百年沉埋之詩一旦遂傳于世然
非其家子孫謹于藏弃諸公前後之勤於搜索殆不

及此云子獲名藿同安人馥按詩篇所存酬答諸賢
僅存別號俱闕其名今詳詩中所許於斯文者錄出
附之師友中以備尚論者考訂其一二有可考者錄
傳附之并附張氏林氏訪釣磯故址記于後云

徵士丘鈞磯先生蔡

丘葵字吉甫同安人家海嶼中因自號釣磯蚤有志考
亭之學初從辛介甫繼從信州吳平甫授春秋親炙呂
大圭洪天錫之門最久風度端凝如鶴立振鷺宋末科

舉廢杜門勵學不求人知元世祖聞其名遣御史馬伯庸與達魯噶齊奉幣徵聘不出賦詩見志所著有易解義書解詩口義春秋通義四書日講經世書聲音既濟圖周禮補亡等書年八十餘卒元時倭寇至其宅他無所犯惟取遺書以去故其著述多無傳僅存周禮補亡及詩集四卷行世周禮補亡今存論者謂其叅訂詳確云其詩尚有八十四歲吟阮氏旻錫曰先生八十四歲猶在卒之年月不載其子孫歲時祭祀必知之當候考

周禮序作於秦定甲子歲時年八十一秦定於元世祖
歷五朝矣則卻聘時當七十餘歲也再考徵士與熊勿
軒先生未交善其贈熊勿軒詩曰穆穆朱夫子於道集
大成嗟予亦私淑與義終難明退翁獨何幸而乃同鄉
生雖後百餘載元機若親承斯文幸未墜載道來桐城
平生疑惑處喜得相考訂秋風吹庭樹忽作離別聲吾
儕各衰老何時重合并願言且少住勿棄斯文盟聖賢
千萬語只在知與行前修何可企勗哉共修程門人呂

椿闕書

熊勿軒集

新舊郡志

宏簡錄

備考

滄溆盧氏若騰序詩集曰吾邑丘鈞磯先生品著於宋末元初論定於昭代既列祀鄉先賢且配享朱文公祠矣八閩通志列之儒林傳中以其曾著四書日講易解疑書直講詩口義春秋通義禮記解經世書聲音既濟圖周禮補亡等書為大有功於經傳然其書今已無傳僅存者惟周禮補亡及其詩集耳學士家每用惋惜而

要之先生所以取重後世者不專在是夫為學莫急於明理明理莫大於維倫先生倫完理愜行誼堪為後學楷撫即不著書立言固足以當學宮之俎豆而無愧矧其窮究天人洞徹性命晚年吟咏篇什足以見其大槩又何必以諸書亡失為先生致惜也先生一抔土不立碑碣萬歷年間或利其地形之勝遂指其祖兆而爭之官為勘驗劄地得誌銘乃加封而表識焉馬鬣漁磯俱歸然後天地老矣先生不求身後名而名卒不可拚無

意於傲天之報而天卒昌厥後士生亂世其可不擇所以自處也哉周禮補亡余曾見梓本詩集則惟其家有寫本林子獲鈔得之喜而示予讀之苦多亥豕稍為訂正擬俟時平梓行非徒表彰吾邑人物亦欲使後學知所興起也夫庚子春正月下弦日同邑後學滄溆盧若騰手題於與耕堂

晉江施氏世駮序詩集曰余論經軒中藏有周禮補亡梓本讀其序即知吾鄉有丘鈞磯先生而海濱耆老及

童孺往往誦先生卻聘詩所謂皇帝書徵老秀才秀才
懶下讀書臺者即知先生工於詩必有集而無從搜訪
也阮輪山為予言先生家小登其子孫藏有先生詩集
不借人欲鈔者具紙筆就其家鈔之意同邑學士大夫
家必傳有鈔本歲乙酉林君子護館於予攜有手訂刪
本予與輪山畧一借閱適歲暮子護即取回明年子護
復來泉未幾物故其殘書多散矣予亟屬吳君石門馳
札就其令嗣借取久之絕無回信倏經三載而竟茫然

今春子獲令嗣以事至泉石門面徵之云鈔本為人所借今檢得所存舊本隨即致上余按其本乃盧牧洲先生及子獲所手較者本極醜惡詩多失次字復差訛兼以敗楮壞爛更苦蟲蛀瞪目視之莫可辨識然的係全集如玉在璞未經剖破殊可喜也予即付輪山從新訂定白峯細閱重鈔余再加較正而授之梓噫以五百年沉埋之詩一旦遂傳於世豐城寶劍躍出龍津豈不稱快然非其家子孫之謹於藏弃諸公前後之勤於搜索

殆不及此因思古來志士仁人遭時否塞其胸中鬱勃不平之氣發而為詩必有一段光芒不可磨滅之處經千百年後有人焉曠世相感為之表彰而不至湮沒如函之于蓋不期合而自合其所遇亦云奇矣然此非志士仁人所遇之奇而表彰者之人所遇之奇也何也獨行則不離跬步附驥則一日千里附前賢以不朽豈易邁哉余因歎斯人所遇之奇心竊嚮往而深媿予固非其人也康熙癸巳歲二月朔日後學晉江施世驥謹序

輪山阮氏旻錫書先生卻聘詩辨正曰考堯山堂外紀載揚鐵崖不赴召有述詩中有商山肯為秦嬰出之句明太祖曰老蠻子欲吾殺之以成名耳遂放回此乃世俗流傳之誤也詩係吾鄉丘鈞磯作見本集題云御史馬伯庸達魯噶齊徵幣不出有述至今海邊童叟咸知誦之其相傳久矣按宋潛溪撰揚鐵崖墓誌云洪武二年召諸儒纂修禮樂書上以前朝老文學思一遣翰林詹同文奉幣詣門謝不至明年又遣松江別駕追趣賦

老客婦詞進御上賜安車詣闕留百有十日禮文畢史
統定即以白衣乞骸骨上成其志仍給安車還山蓋丘
釣磯為宋秀才不赴元世祖之徵楊鐵崖為元進士不
受明太祖之職其志節大抵相類故遂以卻聘詩冒入
鐵崖集中鐵崖詩名滿東南而釣磯僻居孤嶼詩集不
傳人多口誦遂致字句畧有不同耳今悉注之以備覽

堯山堂本云天子來徵老秀才

鐵崖集作皇帝書徵老秀才

秀才懶

下讀書臺

懶下一作不下

商山肯為秦嬰出黃石終從孺子來

鐵崖集作子房本為韓仇出諸葛應知漢祚開一本作
商山本為儲君出黃石終期孺子來又一作諸葛應從
漢祚
太守免勞堂下拜使臣且向日邊回
鐵崖集免勞
作枉於一作

殷勤承上命且向鐵崖集
袖中一管春秋筆不為傍人
作空向一作繾繾日邊回

取次裁
鐵崖集作老夫一管春秋筆留
向胸中取次裁袖中一作袖藏其大畧如此夫

一首之詩甚微而所關人品則甚重余故不可以不辨

此詩為鐵崖所久假已經五百年今鈞磯之集出而趙
璧復完則詩之隨時為顯晦其亦有數哉予固不禁為
之歡顏而破涕也癸巳仲春上弦後學八十七叟輪山

阮旻錫書於類村之迴清亭

林氏霍訪丘釣磯先生故址記曰同邑遵海而南巨島
錯列小登於諸島若漚浮海上最渺也而五百鍾靈宋
丘釣磯先生獨產其上先生後朱考亭百餘年而道學
獨祖考亭運當陽九斂德自全蓋自讀書論世知有先
生久矣蔡虛臺公重修邑乘獨高先生之風而予居去
先生一水不能詳言其遺宅故墟予病焉乃於季夏之
八日戒小舟約王茂才諸君指小登訪焉舟行而東過

石虎砦之前旋及懸崖崖下白沙數武有泉出沙之三石間澄徹而甘即泉郡誌所載仙人井者於是緣崖西南行多石或峭或圓有方石周幾尺許鑄為象馬嬉局而於中分一道則鑄萬機分子路一著笑顏回十字已遭琢沒萬機分子四字完明可摹草甚工蓋先生手筆云輸局步漸西則先生釣石在焉從此東行半里許為鐘山之南有寺曰章法肇於宋而北則先生之所宅址不半畝黍秀離離蓋自明高帝以倭故徒登民一嶼皆

虛成化初乃復舊籍丘氏俱望鐘山之麓列屋而先生之舊址竟廢予與諸君撫景低徊就先生之裔朝準君別業休焉君因出所藏先生詩一編讀之先生之洞天人徹性命觸發皆真而為生人明大義為天地辨大分考亭統緒存以不墜則先生之功誠大矣然先生之高蹤逸韻亦今而後知其詳則豈非有數也哉既歸釋楫遂記之萬歷四十年壬子季夏望後三日後學張日益書於雲海館後六十一年壬子後學林霍再刪訂時仲

夏廿日書於欖園

呂之壽先生椿

呂椿字之壽晉江人幼從丘鈞磯學書過目成誦作文立就貧隱授徒所著有春秋精義詩書直解禮記解所為詩自成一家

閩書

莊容齋先生圭復

莊圭復字生道號容齋思齊之子晉江青陽人篤志勵行以文學名少從遊於丘葵值宋季流亂手未嘗釋卷

誠信孝友建祠宇立祭田入元隱於青陽吟咏自如至
順間福建閩海道知事清江范攄以圭學行聞於朝詔
書屢下終不起年九十一卒於家

何鏡山撰莊氏族譜
序新志節張芳

墓志

教授楊敬在先生相孫

楊相孫字敬在其先本董姓餘杭人至祖君選為元從
事郎潮陽縣尹幼孤從母鞠於楊從楊姓家於泉遂為
晉江人父伯淵為泉州蒙古字學正相孫以諸生為泉

庠直學再補石井書院能公出納斥貪鄙以嚴正自持
陞仙遊教諭攝縣事轉長泰教諭諸政績多可紀朔望
講義諄乎身心之學遷莆田學正上陳參政陳忠肅文
龍死事請旌於朝鋟莆先正劉後村文集又舉攝德化
縣時邑多盜躬造其巢諭降之授漳州教授郡再被兵
學廟莽為儲胥禮樂之器散壞相孫請於大將移兵他
所亟補弊宜缺稍復舊規年七十卒於家相孫自童年
已有文譽及游丘釣磯之門盡去凡近篤志理學戶屢

常滿為文平實古雅務以理勝天性孝謹質諒父母喪
哀毀逾禮廬墓三年所著文集若干卷

泉郡新志畧

處士陳樂所先生必敬

陳必敬號樂所同安之陽翟人少穎悟通五經諸子百
家在宋末一舉不遇遂不復出嘗與丘吉甫講明濂洛
遺學所著有詩聯遺文

同安邑志隱佚

教授劉秋圃先生志學

劉志學字師孔同安人少與兄璧齊名咸淳七年進士

教授台州以親老歸省未幾元兵南下杜門娛親下帷
講誦四方學者從之如雲暮年與同輩論譚淋漓翰墨
種菊數十本號秋圃以陶潛韓渥自方蒲壽庚欲羅致

門下固避之

按先生詩集贈劉秋圃先生十年江上理
絲綸此日桐城喜見君造化由來最我輩

俗儒安得與斯文餘詳集中再按先生咸淳七
年辛未與兄璧同上舍釋褐云 閩書 通志

詹野渡先生

詹先生名未詳別字野渡南劍人丘先生寄之詩曰聖
哲已往古吾儕空自今六經尋斷脈千里遇知音莫笑

因緣淺相期造道深可憐山海隔無路盍朋簪

按鈞磯先生詩

集云寄南劍詹野渡先生考之南劍志乘未得其人錄此待考

矩齋先生

矩齋先生姓名籍貫未詳先生輓之詩曰蚤悟官為崇
晚將家付兒公今返真矣僕尚是人猗柿葉收遺墨梅

花憶贈詩自嫌聞道暮有淚哭先師

按先生詩末語及先師疑是師友于

此公者再按莆陽林氏應成號矩軒疑先後同時未知是否錄出待考

蘓仲質先生

蘓仲質名籍貫未詳先生次韻寄之詩曰十年前事付
流水清夢悠悠何處尋老去誰憐三刖足生來不受四
知金窮途賴有雷陳友大雅應殊鄭衛音俗士紛紛敗
人意何時握手再論心

按仲質疑應舉未售而與公同志節為宋之遺民故云當此窮

途尚賴有雷陳之友共扶大雅之音俗士紛紛皆非知心之侶矣

張尚友先生

張尚友名籍貫未詳先生呈之詩曰秋風匹馬柳江邊
芹泮相逢意浩然吏部文章懸日月龍門史記在山川

翰君何啻百籌上期我曾言千載前造物無情吾輩老

後生誰可囑遺編

按詩中所相期許者皆欲希風千載之上與公同輩行也嘆老囑遺編皆

暮年志事名

籍貫待考

陳萬石呂潛心二先生

陳萬石呂潛心名籍貫俱未詳錄集中分韻詩一首題

云臘月二十九日陳萬石石室呂潛心三兄相訪夜坐

分韻得年字賦二首今錄一首詩曰二十年前舊師友

一燈相對坐談玄爐香茗椀不須睡惟有今宵是舊年

按詩中有舊師友
之云故錄出待考

王巖先生

王巖名姓籍貫俱未詳按集中贈詩題云懷王巖先生
謫廣州忽自古杭有書至贈詩曰十二年前舊師友書
來欲拆淚成行幾回相憶人千里往事追思夢一場琴
劍知辭南國久干戈尚任北方強傷心吾道秋容冷遙

憶師門數仞牆

按詩末云遙憶師門數仞牆疑師門即
王巖也考丘丘公本傳鈞磯早志考亭之

學初從辛介甫繼從信州吳平甫授春秋親炙呂大圭
洪天錫之門最久其疏玉巖者未知屬誰俟考訂增入

以上諸先生與丘公或師或友皆彼時共扶教道而非區區以文術相高者惜志乘殘闕而詩集中又隱其名未得詳考今並錄出以待博考者訂正

泉南諸葛氏家世學派

按何鏡山先生撰諸葛氏世譜序云諸葛之姓蓋漢司隸校尉諱豐丞相武鄉侯亮之後其家於泉為鼻祖者則宋轉運判諱安節由浙仕閩貧不能歸葬即家於南安五傳而為尚書兵部侍郎少保公以柱史使弔於金人求丹靛墨帶之服往正色嚴辭顧盼折

爭於刀戟之間凝然不動其為諄諄家訓者不出忠
孝之一言諸葛氏之祖所以遺其子孫者如此清馥
三復其譜牒所載者自少保之後人物輩生宋社既
屋一門忠孝尤著其志皆欲扶國祚而終臣節其事
皆可揭日月而昭天漢要皆忠武之遺風餘烈也今
錄自宋以前家學載於編端至元明以後則有本編
可考焉

諸葛先生李文

諸葛季文南安人以行誼文學聞於時家貧授徒以養
嘗著六經諸子解有益後學樂道人善如己有之子廷

瑞

清原文獻傳代伯成撰諸葛廷瑞神道碑

少保諸葛麟之先生廷瑞

諸葛廷瑞字麟之南安人父季文以行誼文學聞於時
家貧授徒以養嘗著六經諸子解有益後學樂道人善
如己有之廷瑞穎悟博學擢紹興二十七年進士授龍
溪尉改知崇安時朱文公家食廷瑞每造詣以趙清獻

嘗為崇安宰而胡文定邑人也訪求遺像因新學立祠
請文公為記歲歉屬書文公請於郡倅得粟賑饑守王
淮與轉運使者具以政績聞擢主管官告院奏對稱旨
即日擢起居舍人光宗嗣位會金人有大喪命充弔祭
使至敵境伴使以三節人衣帶服飾為非請易之爭辨
甚厲廷瑞徐折之不為動金不能奪為之加禮使還兼
權吏部侍郎即進起居郎疏言兩淮藩籬不固乞詔侍
從臺諫於文武臣中各舉所知可為沿邊監司郡守者

以待選用詔付三省施行拜中書舍人與留正有連避
改兵部侍郎歲餘以疾授朝散大夫守權兵部侍郎致
仕卒贈大中大夫蔭子二人

按朱子文集并傅氏撰行狀皆未叙及朱子之門惟

道南統緒錄之俟再考
清源文
獻舊郡志
新郡志
閩書

郡守諸葛子嚴先生直清

諸葛直清字子嚴以父任歷海口鎮主管南外睦宗院
知海陽縣通判廣州海陽多水患直清隄之以捍田民
名其田曰諸葛田祠官凡十二任仕終奉直大夫知臨

安府事封開國男食南安縣三百戶子珏琰珏知南安軍

郡守諸葛先生珏

諸葛珏南安人祖廷瑞父直清直清子二珏琰珏知南安軍按李昂英跋北溪陳氏中庸大學講義曰大學中庸之微旨朱夫子發揮備矣北溪翁從之游久以所得鳴漳泉間泉之士有志者相率延之往教翁指畫口授不求工於文采務切當於義理諸生隨所聞筆之成帙

韶州別駕諸葛君當時席下士之一也廣其傳梓嘉與
後學共使之由北溪之流溯紫陽之源而窺聖涯不徒
口耳且必用力於實踐則曰希聖希賢工夫可循循而
詣矣子過曲江得見所未見茅塞豁然尹番禺而始創
黌舍者此諸葛君也珏其名 朱氏經義考

僉判諸葛桂隱先生琰

諸葛琰字如晦號桂隱直清季子為李臞庵之壻宋紹
定三年以任子累官邵武軍光澤縣尉闖寇弄兵山谷

州縣騷動琰提兵轉鬪以身士卒不旬日授首黎庶得
安田畝真西山喜琰忠勤上其事於朝進階儒林郎官
至信州令書判官致政歸琰賦性豪邁有學術在官清
貧與白玉蟾相善蟾詩中所謂桂隱者即琰也再按譜
牒載宋少主南下琰之羣季韶州公參政公進士公倡
義開北城迎駕闔家同死蒲壽庚之難獨琰知宋臘不
再遠識幾先率其子隱武夷山中得免後乃屏居於城
西之古榕今所傳者獨琰一派耳

按宋詩鈔石屏戴氏
復古詩中有久寓泉

南待一故人消息桂隱諸葛如晦謂客舍不可住借一園亭安下即事凡有十首讀此諸葛桂隱似字如晦

進士諸葛先生寅

諸葛寅直清第五子璋之子嘉定十六年進士景炎丁丑蒲壽庚拒命閉城寅首倡義開北門應張世傑之師不濟為壽庚所害年六十九三子俱被害而史綱逸其事可嘆也又按諸葛譜牒同時被難者甚夥詳見後備考內諸葛譜牒事畧

備考

諸葛宋世入泉州譜牒事畧

入泉一世諱安節公

四世諱季文篤學好古洞見大原嘗著六經諸子
解接授後學循循不倦當時人士多宗之家貧
晏如也子三長曰廷瑞尚書少保餘無錄

五世諱廷瑞字麟之季文長子登紹興二十七年
進士累官兵部侍郎守尚書卒于官贈太子少
保子三長直清主管華州雲臺觀次曰禮未仕

而沒三曰應祥提舉常平幹辦公事

六世諱直清字子嚴少保長子以父任歷官知臨
安府事封開國男子五長玠補承事郎二曰珏
韶州府知府三曰琰信州僉書判官四曰琳五
曰璋

七世諱珏直清次子歷官至廣東韶州府知府男
一曰洪

諱琰直清第三子徙家古榕之始祖也以任子

恩歷官至信州僉書判官致政歸卜遷於古
榕與白玉蟾交善白有贈詩見本傳琰知宋
臘不再率其子隱於武夷山中未幾公之羣
季果以倡義一門數百口同死蒲氏之難今
之傳者獨公一派耳子一曰巽兩淮制置司
提幹

諱琳直清第四子子一曰坤

諱璋直清第五子子二曰震曰寅

諱璉應祥長子子二曰甲孫曰葵孫

諱璿應祥次子授職稅院男一曰仲孫

八世諱觀承事郎諱玠之子

諱洪諱珏之子授廣東常平司幹子某倡義為
蒲壽庚所害

諱巽信州僉判諱琰之子歷官兩淮制置司提
幹子二長曰復次曰元中松江府同知

諱坤琳公之子年三十四子一曰應老景炎丁

五年倡義為蒲壽庚所害子應老年二十亦被害

諱震璋公之長子景炎二年倡義為蒲壽庚所害其子亦被害

諱寅璋公次子寧宗嘉定十六年癸未進士景炎丁丑年蒲壽庚拒命閉城寅首倡義舉開北門應張世傑之師不濟為壽庚所害時年六十九三子俱被害而史綱逸其事可嘆也

詳見諸葛譜牒忠節孝義篇

諱甲孫璉公次子補登仕郎子二曰湜曰廉

俱瑒

不畧又云景炎二年丁丑秋八月蒲壽庚閉城

拒命公倡義開北門迎張世傑不克為蒲壽

庚所害詳見忠節譜牒孝義篇

諱葵孫璉公第三子官至廣西參知政事男一

曰潛

瑒不畧

又云景炎丁丑同死蒲壽庚之難

諱仲孫璉公之子景炎丁丑年倡義迎張世傑

為蒲壽庚所害配黃氏俱盡節

九世諱復巽公長子

註出繼王氏

諱元中巽公次子歷官松江府同知有傳子四

長曰泰明溪巡檢次曰晉中書省檢校三曰

謙諱泰諱晉二公見元代師友淵源考

閩中理學淵源考卷三十三

欽定四庫全書

閩中理學淵源考卷三十四

廣平府知府李清馥撰

莆陽林氏家世學派

按林氏九牧著於唐室至宋李積仁之後為矩軒公
應成師友於黃氏績林貞肅又言矩軒松湖親事潘
瓜山陳復齋傳考亭之學與本傳稍異父子祖孫相
繼行東湖仰止之傳歷元代其孫子泉氏以辨子木

氏以順講明正學不衰入明復聯世其美風雲景從
玉井子木二派亦有起者獨瑞安州慎齋之裔特盛
其詳載明代林氏家學焉

宗正林矩軒先生應成

林應成字汝夫號矩軒莆田人唐邵州公蘊之後宋兩
請進士得之公之子嚴重平粹嘗受學於黃績又親事
潘柄陳宓更友其子仲元循仰止規約續講東湖得文
公淵源之懿邃見卓識為一時道學推宗咸淳中與子

棟同登第歷官宗正寺簿宣撫司機宜宋亡不仕年七
十二卒明裔孫刑部尚書謚貞肅俊贊曰莆興道學艾
軒始之復齋繼之復齋瓜山偕事文公公事二公獲聞
文公咸淳之間父子進士不利于施乃見其志東湖講
道戢景逃虛一時相推則有四如文公過吾家題曰門
對小壺山樓接尊經閣四時趣興清萬代詩書樂斷墨
猶存相傳公逮事焉今考文公卒慶元庚申去公咸淳
辛未登第尚六十年豈題述在公祖貢元父兩請時耶

林見素集撰宗正寺簿公贊

邑令林松湖先生棟

林棟字用可號松湖應成長子父子師事潘瓜山陳復齋講道東湖最後棟又事黃氏績友其子仲元與父同登咸淳辛未進士歷知同安縣事有廉直高古之聲慨宋社云屋托興迷途尋焦光舊隱之處講明道學以淑諸人文公之澤注東湖而演迤以盛棟父子達之也裔孫俊贊曰公事陳潘又事于黃父子師友金玉其章建

水有泚日遠彌長瀦之東湖臨視泱泱孰利于涉公也
其航載漕之源載漑之芳有開道先永裔之慶

林見素
集撰同

安公贊

州守林慎齋先生岡孫

林岡孫字于高號慎齋棟仲子文公講道東湖復齋瓜
山傳其學岡孫之祖若父逮事焉四如與矩軒續東湖
之講岡孫偕伯兄教授于野又逮事焉傳介父弟山長
子泉同知子木父子兄弟四進士退而益修文公之學

型治所就世林門文章世林筆位遇雖不逮關西而物
品殆類岡孫終瑞安州知州事狀遺失所附見與子木
並廉名明裔孫俊贊曰漢有荀陳宋有胡蔡建陽大成
儒宗允賴紫氣停焰脈焉如帶孰引而長以滴以大業
維經承巧乃冥會三葉弗辰爰有遺愛綠槐蔭庭久而
未艾星流日翔碑板光怪

林見素集撰知州公贊

山長林玉井先生以辨

林以辨字子泉號玉井父拙贈曲陶郡伯以辨通易書

春秋尤善說詩皇慶中詔以科目取士以辨不苟求合
究心程朱之學福泉之士爭聘為師云

郡志

閩書

黃德遠先生績學派

按德遠先生從遊朱門高弟同時學者如長樂趙公
以夫諸賢皆相與上下議論至其子四如先生又勵
志前修能行其家學云

黃德遠先生績

黃績字德遠莆田人滔之裔兄績寶慶二年進士績少

凝重稍長慨然有志求道始游淮浙遍參諸老中年還里聞陳師復潘瓜山得朱子之學于黃勉齋遂師事之集同志十餘人于陳氏仰止堂旬日一講及師復瓜山繼卒遂築東湖書堂請田于官春秋祀焉聚講一如平時向之同門友皆於績質正矣先是郡守楊棟即學宮建尊德堂以處劉壽翁彌邵劉卒無敢居之者至是邦人推績繼之涵江書院始賜額又以績兼其山長晚聞趙以夫作易通與之上下其議論以夫稱為益友年七

十一卒前夕有星隕于書樓之西是日又大雷雨衆皆驚異蓋績雖布衣為鄉先生三十年門人著錄牒以數十百計郡邑守令咸加敬禮兄弟皆與劉克莊善克莊目兄曰愛友績曰畏友績有齋名獨不懼克莊為記生平不喜作韻語偶有感興亦得風人之趣著有四書遺

說等書子仲元

閩書

莆陽文獻

莆邑志

推官鄭帝臣先生獻翁

鄭獻翁字帝臣莆田人伯玉裔孫少從鄉先生黃績學

第咸淳初進士終漳州推官宋亡至元不仕方是時前輩舊德多已淪謝後生頗染習俗翁獨以所學傳諸人故家子弟猶賴之不墜其業顧長卿兄弟皆出其門復以績之子仲元及其徒林應承倡仰止之學續東湖之祀鬻田數十畝為春秋釋奠費年七十餘終

鄭彝白先生鉞

鄭鉞一名少偉字彝白號舒堂莆田人露裔咸淳十年特奏名與黃仲元郭陞俱閩中之望陳忠肅公文龍守

興化軍鉞其門客也記忠肅遺事其言痛憤激烈至元
不仕嘗與陳子修讐校通志畧盡復夾漈聯比詮次之
舊詳見陳旅傳又著孔子年譜仲元序之謂是譜首以
陬大夫二事歷卷前書所未有謂儀封人請見為由魯
適衛時謂魯公問政及答季康子數問皆歸魯以來事
此見又確謂夫子未嘗師郟子謂行乎季孫三月不違
斯言非知夫子者此論又高所著有雲我文集亦仲元
為序

莆陽文獻

縣志

黃四如先生仲元

黃仲元字善甫號四如績之子莆田人少刻意周程張
朱呂真魏及父所傳潘柄陳宓之書以其餘力抄唐宋
名文二百餘家文學為一時推重咸淳七年中省闈第
五廷對以直言忤時宰賜同進士出身調監瑞安府比
較務需次食貧陳忠肅文龍延仲元於二劉祠堂一月
兩講為學者師九年捧檄考類試歸過劍州時江萬頃
為劍州守留之郡齋未幾萬頃兄萬里招致芝山十年

請假歸省明年德祐改元始之官守相陳山泉屈致幕
下深喜得人又明年春端明陸秀夫至自平江偶同邸
舍一見褒歎飲食必俱炙燭對酌劇談達曙及聞杭陷
挑包辭歸資送仲元又留行橐夏五趣仲元赴行都充
益王府撰述官兼處置使司幹辦公事景炎元年改刑
工部架閣以通直郎陞武學諭遂轉朝奉郎國子監簿
兼福建路招捕使司都參議官仲元雖受知諸公屢膺
超擢然未嘗供一日職升斗不批券歷曰斯時何時殺

而耻也秀夫拜樞使將有異除仲元力辭母老崖山破秀夫盡驅妻子赴海仲元為詩哭之遂更名淵字天叟怡然窮居深入理奧學文必擅弓鼓梁學詩必三百篇陶韋柳州推廣先志凡其口講心授莫非仰止傳習之懿而尤嚴東湖之祠晨必謁朔望必參二仲釋菜暇則課守者洒掃風雨則視其蓋障雖老不少廢年八十二卒仲元說經間與先儒異同其為文亦類艱深至於奇古處殆不可句云有四書講稿等書藏于家明宋濂歐

陽德羅洪先序其集

閱書

莆邑志

莆陽文獻

林淑恭先生立之學派

考仙遊志乘如林公立之林公礪游公彬王公夢猷
皆一時經生家所頌法者也原其所立皆以道德學
術足為師表今錄其派繫可考者著于篇

林淑恭先生立之

林立之字淑恭仙遊人通六經以禮記三魁鄉書聚徒
縣庠如日選丘獻林從周林志之林灝李夢龍蘇國蘭

黃君任洪天賦諸先達皆出其門仙遊經學之盛自立
之始

司直丘渭夫先生獻

丘獻字渭夫仙遊人少嗜讀書尤明周禮由鄉舉補太
學寶慶二年進士調昭慶軍節度掌書再調江東提刑
司幹官諸公交薦其賢除太學錄尋除大理寺司直為
人長厚與同列無間言鄉人葉大有尤敬重之官至奉

議郎終

通判洪先生天賦

洪天賦仙遊人祖中元祐六年進士歷河南府少尹國
子司業勇退不仕天賦幼敏悟通六經應童子科登寶
慶二年進士歷知陽江古田連江三縣通判循州聽訟
不施鞭朴諄諭理道民胥向化以循良稱從弟處厚

仙遊志

附缺傳

林日選嘉定七年進士

林從周礪從姪寶慶二年進士

林志之礪弟紹定二年進士

林灝

李夢龍嘉定七年進士仙遊志入儒林傳

蘓國蘭欽之孫姪孫總龜寶慶二年進士

黃君任端平二年進士

縣尉林豈獻先生礪學派

按仙遊志列先生在儒林又傳稱其通習五經然考

藝文於經術未見有發明者所著有典故鉤元之書
行于世

縣尉林宣獻先生礎

林礎字宣獻嘉定十三年登進士第少負雋聲從遊者
衆王邁嘗師事之官止海陽縣尉有典故鉤元六十卷
行於世

主簿游淑文先生彬學派

按先生本傳稱先生工於詩賦又朱氏經義考載先

生有讀易四卷興化志載端平中特奏名

主簿游淑文先生彬

游彬字淑文仙遊人家貧苦學工詞賦有聲一時名士如林澧特延為館賓葉棠王邁皆與為友陳立伯塤伯傳澄皆師事之端明二年特奏名終真陽主簿

仙遊志

附缺傳

陳立伯寶慶二年進士寵之孫次升曾姪孫

陳塤伯次升五世孫

傅澄

張紹卿先生應辰學派

按先生門徒鄭氏起東在明初尚存則公亦宋元間遺德也餘俟考

張紹卿先生應辰

張應辰字紹卿德化人該通經史一時名流黃震發徐雷開林汝作鄭起東皆出其門有禮記集解

鄭先生起東

鄭起東字子震德化人明初入太學為文人明經鄉校
師範蔚然

黃先生霆發

黃霆發德化人嘉定七年進士

徐先生雷開

徐雷開德化人寶慶二年進士

林先生汝作

林汝作德化人淳祐七年進士

閩中理學淵源考卷三十四

欽定四庫全書

閩中理學淵源考卷三十五

廣平府知府李清馥撰

三山郭梅西諸先生學派

按元代去宋季未遠其時師資講習此邦淵源回溯尤近今讀郭氏梅西歐陽氏以大陳氏希說陳氏奎甫諸先生傳記述簡冊渺無師資源流可考只著其略而已惟時勉齋瓜山正卿子武諸賢相去百年未

遠故家文獻之餘豈無一二可推而得其端緒何至
傳中援証迄無一辭及之而私淑其一二耶然考傳
中四先生師道甚立則彼時傳習之徒亦必多有可
紀惜載籍浸湮無從考證耳今錄四先生著之篇首
存其師範以待他日考訂增入云

純德郭梅西先生陞

郭陞字德基長樂人父正子號存齋宋紹定中進士教
授廉州著春秋傳論十卷陞幼孤弱冠已為人師至元

中舉遺逸授泉山書院山長遷興化路教授改吳江州
再調興化未行卒學者私謚曰純德先生為人䟽通慷
慨謹直簡易為子以孝為父以慈與人交彌久而孚談
經明白統貫不刻鑿為異於四書易皆有述概詩若文
和平而沉深著有梅西集二十卷

閩書

按福州府選舉志郭正子字養正紹定五年壬辰進
士登徐元杰榜本州解元廉州教授閩書英舊選舉
目次載亦同及檢閱朱氏經義考春秋彙載郭氏陞
小傳云長樂縣志郭陞字德基宋紹定進士至元中
泉山書院山長云云竟遺却父郭正子名字以紹定
進士屬之其子矣蓋郭正子宋人也郭陞元人也未

知經義考引用時傳寫脫落抑長樂志本屬脫誤因恐讀經義考者不詳郭公陞出處大節謹標出以待考訂者審之乾隆戊子四月上幹清馥謹書

歐陽以大先生仇

歐陽仇字以大長樂人隱居著述動循禮法學者師焉著四書釋疑五經旨要性理字辨格物啟蒙忠孝大訓女範幼學等書子潮舉莆田教諭通五經稱五經先生道南源委

陳希說先生有霖

陳有霖字希說長樂人至正中築鄉約堂於藍田書院之旁中祀先聖以朱呂二先生配朔望舉行藍田鄉約使隣里子弟講學於中嘗與歐陽仇往來論道尚書貢師泰為作義士記

三山新志

陳奎甫先生仲文

陳仲文字奎甫長樂人隱居山林性嗜學敦孝友與族子潔建書堂于藍橋林壑中以程朱正學倡鄉人課其文行名為義學

閩書

通志

林文敏諸先生學派

余讀林氏清源大同書院記知彼時私淑於考亭者深矣傳中載與盧氏琦陳氏旅林氏以順稱閩中文學考諸君子秉道立德師資可藉皆互有發明陳氏旅後從虞公邵菴卒業晚歲所造殆未可以文士而輕置之也元代紀載不備多失紀錄其於潛德之英湮沒多矣故今亦就元史文學隱逸中並採可進於道德者錄出如陳氏旅楊氏載鄭氏東起林氏泉生

皆不得而闕遺之也茲緝其大略著于篇

文敏林清源先生泉生

林泉生字清源永福人與盧琦陳旅林以順稱閩中文
學天歷庚午進士授福清州同知適山海寇充斥以計
殲之轉泉州經歷民負酒稅繫者多瘐死悉破械出之
令船商私釀者代償歷漳州推官畬洞相戒勿犯擢知
福清州會紅巾寇連江帥府檄泉生禦之乃創保甲置
屯柵立誅鹽丁謀亂者七人捕殺長樂謀內應者三十

餘人先發制之賊遂驚潰福清俗好殺孤幼誣訟求賄
泉生立連逮親鄰法民不敢犯除翰林待制以母老辭
累遷行省郎中汀寇負固久不下往招撫得渠帥歸召
為翰林直學士知制誥卒謚文敏泉生邃於春秋工詩
文多權畧有將才屢建武功然以志略自負不能下人
以此多得謗者後稍自晦抑署其齋曰謙牧晚益折節
更號覺是軒為文宏健雅肆詩豪宕道逸所著有春秋
論斷及覺是集二十卷

三山新志

聞過齋撰墓志

學諭鄭子經先生杓

鄭杓字子經永福人宋鄭富曾孫泰定中辟南安學諭
與陳旅為文字友嘗著春秋解義覽古編次夾漈餘聲
樂府又有衍極五篇衍極記載三篇其書自蒼頡迄蒙
古凡古文籀隸以極書法之變皆有論定陶鎔歷代之偏
駁會歸一藝之純粹福建宣撫使齊伯亨採而上之即
城東第宅作衍極堂以藏其書吳聘君與弼稱其考論
最正宋端儀又謂其書中若九德若正邪若四時餘閔

之屬又其所自得者

閩書

莆陽文獻

鍾元長先生耆德

鍾耆德字元長閩縣人博極羣書詩文渾雄嚴整家貧不娶授徒養親晚經至正之亂舊業蕩盡恨缺甘旨親沒哀毀幾滅處二弟順德明德怡怡如也有自省錄養

正集等書明德清詞懿行與兄齊名

閩書

林以寧先生清

林清字以寧長樂人經明行修泰定間年七十餘屢辟

不就賜號梅隱處士又有林清閩縣人宋亡不仕匿跡
山寺變姓名能詩孫誌見明代學派

閩書

鄭先生東起

鄭東起福清人舊名震龍家居教授常百餘人為文章
有氣魄元憲使程鉅夫名其集曰自然機籟亦善字書
學者多寶愛之

閩書

教授敖君善先生繼公

敖繼公字君善長樂人後寓家吳興築一小樓坐卧其

中冬不爐夏不扇出入進止皆有常度日從事經史吳
下名士多從之游初仕定成尉以父任當補京官讓於
弟尋擢進士對策忤時相遂不仕益精討經學而尤長
於三禮嘗以魯高堂生博士禮十七篇即今儀禮也生
之傳既不存而王肅袁準陳銓蔡超宗田僧紹諸家註
亦未流傳於世鄭康成舊註儀禮疵多醇少學者不察
因復刪定取賈疏及先儒之說補其闕文附以已見名
曰儀禮集說凡十七卷成宗大德中以浙江平章高彥

敬薦擢信州教授未任卒趙孟頫倪淵皆師事之

宏簡錄

閩書 三山志

鄭叔起先生震

子所南

鄭震後更名起字叔起號菊山連江人道學君子早年
場屋不遇客京師三十餘年晚為安定和靖二書院山
長又開講於平江無錫伏闕論史嵩之淳祐丁未鄭清
之再相震登其門罵曰端平敗相何堪再壞天下被執
與子女俱下獄京尹趙與籌縱之鄭罷相乃免與林獻

齋周伯弱為行輩詩有倦遊藁仇山村選四十首為清雋子所南作家傳云得詩十五篇此蓋流落交遊間者所南未之見也

宋詩抄 三山志忠義

鄭所南字憶翁一名思肖以太學生應博學宏詞會元兵南下所南猶叩闕上書元之人爭物色之遂變名曰思肖僑寓吳下時時望臨安舊都野哭若狂終身誓不見朝士有鐵函經藏蘇州承天寺古井中以久旱浚井得一函錮之再重中有書一卷名曰心史其藏書之日

為德祐元年明崇禎庚辰始出人異之

福州通志
州府志

蘇

藍仲晦先生光

藍光字仲晦原江西臨川人受業吳澄與危素為同門友素薦引之適仲謙叅政江西辟光從事以功授南安路知事轉閩照磨尋陞檢校綜理閩清邑事改行省都事因家於閩後素復為明侍從官薦光光謝病不起深衣幅巾家居教授五十餘載以節終年九十九葬賢沙

通志

莆陽劉原範諸先生學派

余讀原範先生衍極書知考道問學者深矣惟時莆
中淵源最正艾軒之遺槩紫陽之流徽正獻忠肅之
家學萃集斯土故有元一代授學傳經之儒託跡於
斯未易一二數也再方氏伯載出陳忠肅公文龍之
門似應附忠肅宋季遺民故不及錄云

劉原範先生有定

劉有定字能靜莆田人其先與夙朔同出元豐進士似

遠孫少貧性剛直不嗜榮進沉潛志學嘗著衍極書五篇又原範吟三十七章司業吳源謂其推闡圖書之秘發揮象畫之妙究極前後體用之所以然一部全易也學者稱原範先生

陳浮丘先生紹叔

陳紹叔字克甫莆田人幼好學終日危坐一室俯讀仰思嘗為學者講論璣衡遂揉木為儀象以示之既而鑄銅倣古制又別制器象天體虛其中而懸之列周天度

數而以鈿螺填之揭南北二極凡天河星宿皆列其名使夜視之與天象合圍四尺五寸有奇名曰小天至於河圖洛書太極通書律歷制度靡不研究有外集百餘卷題曰浮丘集學者稱浮丘先生

按黃氏海道南統緒入元儒今從之

黃潛崗先生方子

黃方子字潛崗莆田人著論語講義

按道南源委列之著書目內其實

待考

教授顧子元先生長卿

顧長卿字子元莆田人以薦歷福州路教授嘗移書助
教陳旅責其不作宋遼金三史旅以書示學士虞集曰
江南有此秀才大不易得及謁選京師會開局修三史
長卿即以所自著史藁上中書得辟史局以議不合移
疾去

通志

總管朱原道先生文寔

朱文寔字原道莆田人泰定中進士由甌寧縣尹至泉
州路總管致仕博學洽聞宋文憲濂稱其文言醇而理

彰著有葵山集

宏簡錄

教諭林先生重器

林重器莆田人為教諭開明聖賢蘊奧循循善誘著四

書典要詩經意說見三山流寓

三山志

林子泉先生以辨弟以順

林以辨字子泉莆田人祖應成見宋潘炳學派以辨通
易書春秋尤善說詩皇慶中詔以科目取士以辨不苟
求進究心程朱之學弟以順字子睦元至治進士累官

同知福州總管府事

縣丞方遂初先生德至

方德至字遂初宋公權之孫幼能讀先世書長而求諸
三古四聖人及宋程朱二氏之經之傳沉潛厭飫豁然
以通至正間登第授永嘉丞家貧授徒養親與其婦廖
相安羈窮淡苦中後廖雙盲德至永嘉代歸父母堅欲
其別娶德至婉辭邑人義之

閩書

山長林先生善同

林善同宋福州守柝四世孫好學工詞賦授泉山書院
長元亡不仕明初以賢良官召起以祖母年老辭既復
起之行至建州寄所作顧氏義妾詩有有妾猶知遵禮義
此身那肯負綱常之句竟死于道

閩書

閩中理學淵源考卷三十五